

PEMBERITAHUAN PERTANYAAN DEWAN RAKYAT, MALAYSIA

DARIPADA : Y.B. PUAN SITI ZAILAH BINTI MOHD YUSOFF
(RANTAU PANJANG)
PERTANYAAN : LISAN
TARIKH : 27.03.2017

Y.B. PUAN SITI ZAILAH BINTI MOHD YUSOFF [RANTAU PANJANG] minta **MENTERI KEWANGAN** menyatakan jumlah pengurangan hasil Kerajaan pada tahun 2015 dan tahun 2016 akibat penyusutan nilai tukaran wang asing berbanding dengan Ringgit Malaysia (RM).

JAWAPAN

Tuan Yang Di-Pertua,

1. Penyusutan nilai mata wang bukanlah suatu yang unik kepada Malaysia sahaja. Keadaan ini turut dialami oleh mata wang serantau yang mencerminkan terutamanya pengukuhan dolar AS. Pada tahun 2016, nilai ringgit telah menyusut sebanyak 4.3% berbanding dolar

AS. Penyusutan nilai ringgit kebanyakannya didorong oleh perubahan aliran dana yang dipengaruhi oleh faktor luaran.

3. Faktor-faktor tersebut termasuklah jangkaan terhadap kenaikan kadar faedah, kenaikan kadar dasar Federal Reserve AS, ketidaktentuan dalam harga minyak mentah dunia, dan kebimbangan terhadap kadar pertumbuhan ekonomi dan ketidaktentuan pasaran kewangan di China. Selain itu, ketidaktentuan politik di UK, kawasan Euro dan AS, juga menjejaskan permintaan terhadap aset dalam pasaran sedang pesat membangun, yang seterusnya memberikan kesan negatif terhadap kebanyakan matawang negara-negara sedang pesat membangun dan serantau, termasuklah ringgit.

4. Sungguhpun nilai ringgit menyusut, sebahagian sektor dalam ekonomi domestik, menerima manfaat daripadanya. Pada masa yang sama juga, terdapat sebahagian lagi sektor ekonomi yang akan terjejas. Pengeksport akan menerima manfaat dari segi hasil eksport yang lebih tinggi dalam nilai ringgit atau peningkatan dalam permintaan bagi barangan buatan Malaysia berikutan harganya menjadi lebih murah. Manakala, bagi pengimport, akan berlaku peningkatan kos memandangkan barangan import menjadi lebih mahal. Sebagai sebuah negara pengeksport bersih, penyusutan nilai

ringgit memberi kesan yang positif, terutamanya kepada eksport perkilangan Malaysia yang menyumbang sebanyak dua pertiga daripada jumlah eksport kasar.

Tuan Yang Di-Pertua,

5. Bagi Kerajaan Persekutuan pula, dedahan (*exposure*) secara langsung terhadap risiko pertukaran wang asing, hanyalah terhadap bayaran khidmat hutang bagi pinjaman luar pesisir, yang meliputi bayaran keuntungan (kupon) dan pinjaman yang diperolehi dari sumber dua hala (antara kerajaan dengan kerajaan) dan pelbagai hala (institusi kewangan antarabangsa). Pembayaran khidmat hutang yang dibuat adalah berdasarkan kepada jadual yang telah ditetapkan oleh pemegang bon, sukuk serta pemberi hutang yang lain.

6. Sepanjang tahun 2015, sebanyak RM0.6 billion atau 2.3% daripada jumlah bayaran khidmat hutang telah dibelanjakan bagi bayaran keuntungan (kupon) sukuk dan pinjaman yang diterbitkan di pasaran luar pesisir dalam mata wang asing. Manakala, bagi tahun 2016 pula, RM0.7 billion atau 2.8% daripada jumlah bayaran khidmat hutang telah dibelanjakan untuk tujuan yang sama. Peningkatan bayaran khidmat hutang ini adalah disebabkan oleh antara lainnya

terbitan hutang baharu pada tahun 2015 dan 2016 bagi tujuan memenuhi keperluan membayar balik hutang yang matang serta membiayai defisit.

7. Untuk makluman Ahli Yang Berhormat, pendedahan kedudukan hutang Kerajaan Persekutuan kepada tukaran mata wang asing adalah amat kecil. Sehingga akhir Disember 2016, jumlah hutang Kerajaan Persekutuan adalah berjumlah RM648.5 bilion atau 52.7% daripada KDNK. Daripada jumlah itu, sebanyak RM624.8 bilion atau (96.4% dari jumlah hutang; 50.8% daripada KDNK) adalah dari sumber domestik manakala sebahagian kecil sahaja iaitu RM23.7 bilion (3.6% dari jumlah hutang; 1.9% KDNK) adalah daripada sumber luar pesisir. Oleh yang demikian, perubahan kadar tukaran asing memberi impak yang minima kepada bayaran khidmat hutang.

8. Pada masa yang sama, dedahan terhadap hutang dalam mata wang dolar AS yang terdekat adalah pada tahun 2021, iaitu tranche ke-2 Sukuk Global 2011 yang berjumlah USD0.8 bilion. Dengan pelbagai usaha yang telah diambil oleh Kerajaan untuk mengukuhkan asas ekonomi dan merangsang kadar pertumbuhan yang mapan, adalah dijangka kadar tukaran asing pada masa tersebut adalah lebih baik dan secara tidak langsung mengurangkan risiko terhadap

tukaran asing.